

**Articles veritables sur les horribles / grandz & importables abus de la Messe papalle:**  
Inuentee directement contre la sainte Cene de Jesus Christ.

**Je Inuocque le ciel & la terre** / en tesmoignage de Verite: contre ceste pompeuse & orgueilleuse messe papalle / par laquelle le monde (si Dieu bien tost ny remede) est / & sera totalement rume / abyssine / perdu & desole: quand en icelle nostre Seigneur est si oultrageusement blasphemé: & le peuple seduit & aveugle: ce que plus on ne doit souffrir ny endurer. Mais affin que plus aysemēt le cas soit dung chascun entendu: par articles il conuient proceder.

**Premierement** / a tout fidele chrestien / est & doit estre tres certain que nostre Seigneur & seul sauueur Jesus Christ come grand euesque & pasteur lequel ne peut / & ne doit iamais estre reitere par aucun sacrifice visible: qui ne veult entierement rendre a iceluy come sil estoit inefficax / insuffisant / & imparfait. Laquelle chose non seulement dire: mais aussi peser / est horrible / & execrable blasphemie. Et toutesfoys la terre a este / & est encore de present en plusieurs lieux chargee / & repliee de miserables sacrificateurs: lesquels come silz estoient noz redempteurs se mettēt au lieu de Jesus Christ: ou se font copaignons diceluy / disans: Quilz offrent a Dieu sacrifice plaisant / & agreable come celui de Abraham / Isaac & Jacob / po<sup>r</sup> le salut tāt des viuans que des trespasses: laq<sup>l</sup>le chose ilz font apertement cōtre toute Verite de sainte escripture. Car par le grand & admirable sacrifice de Jesus Christ / tout sacrifice exterieur et visible est aboly et euacue: & iamais aultre nest demoure. Le q<sup>l</sup> ie dis est tresamplement monstre en lepistre aux Hebreux es chap. 7. 9. & 10. lesq<sup>l</sup>z ie supplie a tout le monde diligemment considerer. Toutesfoys po<sup>r</sup> Vng peu le toucher / & ayder lesperit des plus petis / au. 7. il est ainsi escrit: Il estoit couenable q<sup>l</sup> no<sup>s</sup> eussions Vng euesq<sup>l</sup> / saint / innocēt / & sans macule: leq<sup>l</sup> na point necessite de offrir tous les iours sacrifices: premierement pour ses pechez / puis apres po<sup>r</sup> ceulx du peuple: car il a fait ce / en se offrant Vne foys. Notamment il dit: En se offrant Vne foys. Car iamais ceste oblato<sup>n</sup> ne fut ny ne sera reiteeree / ne aucune pareille. Itē au. 9. cha. Christ euesque des biens a aduenir par son propre sang est entre Vne foys es sanctuaires. Doicy ou de rechief il dit que par se estre presente Vne foys / redemption eternelle est faicte. Parquoy il est euidēt que en nostre redemptio<sup>n</sup> ne auōs besoing de telz sacrificateurs / si nous ne voulōs rendre a la mort de Jesus Christ. Item au. 10. chap. Doicy ie viens: affin sire Dieu que ie face ta Volunte / par laquelle Volunte / nous sommes sanctifiez par loblato<sup>n</sup> Vne foys faicte du corps de Christ. Et aussi le saint esperit le testifie / disant: ie nauray plus souuenance de leurs inq<sup>l</sup>tez: & la ou est remissio<sup>n</sup> dicelles / il nya plus doblato<sup>n</sup> pour le peche. Le q<sup>l</sup> par argumēt inuitable de S. Paul / ie mostre ainsi. Aux chap. 5. 7. 8. & 10. des Hebreux. Le saint apostre dit: q<sup>l</sup> pour l'imperfectio<sup>n</sup> des sacrifices de l'anciēne loy / falloit tous les iours recommencer iusque a ce que il en ayt este offert Vng du tout parfait: ce q<sup>l</sup> a este fait Vne foys par Jesus Christ. De icelle demāde a tous sacrificateurs: si leur sacrifice est parfait ou imparfait. Sil est imparfait / pourquoy abusēt ilz ainsi le paoure monde: Sil est parfait pourquoy le fault il reiterer: Mettez vous en auant sacrificateurs / et si vous auez puissance de respondre / respondes.

Christi  
mori / et  
est de pre  
sentari /  
idem.  
Doyez  
to<sup>r</sup> les  
chap.  
Il n'y est  
dare me  
dium.

mat. 23.  
mar. 16.  
Act. 1.  
Ebr. 1.  
Act. 8.  
Fulgen  
tius ad  
Thasim  
lib. 2.

**Secondement** / en ceste malheureuse messe on a puoique quasi l'uniuersel mode a idolatrie publicq<sup>e</sup> / quād faulcēmēt on a done a entēdre / q<sup>l</sup> soubz les especes de pain & de Vin / Jesus Christ corporellemēt / recellemēt / & de fait / entierement & personnellemēt en chair & en os / aussi grand & parfait cōde de present il est viuāt / est cōtenu & cache. Le q<sup>l</sup> la sainte escripture & nre foy pas ne no<sup>s</sup> enseigne / mais du tout est au cōtraire. Car Jesus Christ apres sa resurrectio<sup>n</sup> est mōte au ciel / assis a la dextre de Dieu le pere tout puissāt / & de la Viēdra iuger les viuans & les mortz. Aussi S. Paul aux Colos. 3. escript ainsi. Si vous estes refusez avec Christ cherchez les choses q<sup>l</sup> sont en hault / ou Christ est scand a la dextre de Dieu. Il ne dit point cherchez Christ q<sup>l</sup> est a la messe / ou au sacraire / mais au ciel. Parquoy il sensuit bien / si sō corps est au ciel / pour ce mesme tēps / il nest point en la terre: & sil estoit en la terre / il ne seroit point au ciel / car pour certain iamais Vng Veritable corps / nest q<sup>l</sup> en Vng seul lieu pour Vne foys. Le que S. Augustin a bien cōgneu quād en parlāt de Jesus Christ / il a ainsi escript: Donec finiat<sup>r</sup> seculum sursum dñs est: sed tamen hic nobiscum est veritas dñi. Corpus enim in quo resurrexit in vno loco esse oportet / veritas autē eius vbiq<sup>e</sup> diffusa est. Item Fulgence escript ainsi: Absens erat celo secundum humanam substantiā / quum esset in terra / & derelinquēs terram / quum ascendisset in celum: secundum vero diuinam & immensam substantiā / nec celum dimittens quum de celo descendit / nec terram deserens quum ad celum ascendit. Dultre nous auōs infallible certification par la sainte escripture Matth. 24. que l'aduenement du filz de l'homme quand il luy plaira partir du ciel / sera visible & manifeste: & se aucun vous dict / icy est Christ / ou la / ne le croyez point. Jesus Christ dit ne le croyez point / & les sacrificateurs disent: Il le fault croire. Disposez vous paoures idolatres a recognoistre vostre erreur / & confesser Verite / ou en brief temps vous cōuēdra respondre a Vng petit traicte / lequel (Dieu aydant) sera cōpose particulierement de ceste presente matiere / si claiement & apertement quil ny aura femme ne enfant qui ne congnoisse vostre damnable ceate.

1. cor. 11.  
mat. 26.  
mar. 14.  
Luc. 22.  
1. cor. 11.  
Act. 10.

**Tiercement** / iceulx paoures sacrificateurs pour adiouster erreur sur erreur ont en leur frenaisie dict et enseigne apres auoir soufflé ou parle sur ce pain que ilz prennent entre leurs doigtz / & sur le Vin quilz mettent au calice quil ny demeure ny pain ny Vin / mais come ilz parlent de grans & prodigieux motz / par Transsubstantiation / Jesus Christ est soubz les accidens du pain & du Vin cache & enuolope: q<sup>l</sup> est doctrine des diables / cōtre toute Verite / & apertement cōtre toute escripture. Et ie demāde a ces gros enchaperōnez ou ont ilz inuētē & trouue ce gros mot Transsubstantiation: S. Paul / S. Matthieu / S. Marc / S. Luc / & les anciēs peres nont point ainsi parle: mais quād ilz ont fait mētion de la sainte Cene de Jesus Christ / ilz ont apertement & simplement nōme le pain & le Vin. Doyez S. Paul comme il escript: L'homme se esprouue soy mesme / il ne dit point Doyez a Vng tondu pour estre esprouue / mais il dit se esprouue soy mesme: puis sensuyt / & ainsi mangeusse de ce pain / il ne dit point mangeusse le corps de Jesus Christ qui est soubz la semblance / soubz lespecce ou apparence de pain / mais apertement & purement il dit / mangeusse de ce pain. Or est il certain que les escriptures ne vse point de deception / & que en icelle il ny a point de faintise / donc il sensuyt bien que cest pain. Item en Vng autre lieu il est ainsi escript. Et Vng iour de sabbat quand nous estions assemblez pour rōpre le pain. Ausquelz tant euidens passages la sainte escripture dit & prononce expressement estre pain / non point especce / apparence / ou semblance de pain. Qui pourra donc plus soubstenir / porter / & endurer telz moqueurs / telles pestes / faulx antechristz: Lesquelz come presumptueux & arrogans / selon leur ordinaire coustume / ont este si temeraires et hardis / de conclurre & determiner au contraire. Parquoy come ennemys de Dieu / et de la sainte parole / a bon droit on les doit reiecter / et merueilleusement detester.

**Quartement** / le fruit de la messe est bien contraire au fruit de la sainte Cene de Jesus Christ / qui nest pas de merueilles / car entre Christ & Belial il nya rien commun. Le fruit de la sainte Cene de Jesus Christ est publicquemēt faire protestation de sa foy / & en confidēce certaine de salut / auoir actuelle memoire de la mort & passion de Jesus Christ / par laquelle nous sommes racheptez de dānation et perdition. Auoir aussi souuenance de la grande charite et dilection de quoy il nous a tant aymez que il a baillē sa Vie pour nous / et de son sang nous a purgez. Aussi en prenant tous dung pain & dung breuuage nous sommes admonestez de la charite & grande Vnion en laquelle tous dung mesme esperit nous debuons Viure et mourir en Jesus Christ. Et cecy bien entendu resiouyst lame fidele / la remplissant de diuine cōsolation / en toute humilite croissante en foy de iour en iour / se exerceant en toute bonte / tresdouce et amiable charite. Mais le fruit de la messe est bien autre / mesme comme experiece nous demōstre / car par icelle / toute cōgnoissance de Jesus Christ est effacee / predication de leuangile reiectee & empeschee / le temps occupe en sonneries / Vilemens / chāteries / ceremonies / luminaires / encense / mens / desguisemēs / & telles manieres de singeries / par lesquelles le paoure monde est come brebis ou moutons miserablemēt entretenu & pourmenē / et par ces loups rauissans / māge / rongē / & deuore. Et qui pourroit dire ne peser les sarreains de ces paillardz: Par ceste messe ilz ont tout empoigne / tout destruit / tout englouty / ilz ont desherite princes & roys / marchans / seigneurs / & tout ce que on peult dire / soit mort ou vi. Par icelle ilz Viuent sans soucy / ilz nont besoing de faire rien / destudier encore moins / que Voulez vous plus: Il ne se fault donc esmerueille se bien fo<sup>r</sup> ilz la maintiennēt / ilz tuent / ilz brulent / ilz destruisent / ilz meurtrissent comme brigans / tous ceulx qui a culx contredissent / car aultre chose ilz nont plus / que la force / Verite leur fault / Verite les menasse / Verite les suyt et pourchasse / Verite les espouuante. Par laquelle briefuement seront destruits. Fiat, fiat, Amen.